

Jahresbericht vom Tanze 2014

Nachemne turbulänte Jahr im 13äni hei mir du ab äm März wieder äs neuis Tanzleiterpaar gfunge. Sit denn leite üs Daniela und d'Ernst Rohrer us Utzigen mit viu Freuid u Gedult. Zyt drvor het Tanzleitere Heidi Beyler us Burgistein überbrügget. Ihre möchte mir a dere Steu ganz, ganz härzlech für ihre toll Isatz „Merci“ säge. Bi ihre het ou dr Humor immer äs Plätzli gha.

Am 25. u 26. Januar sie sächs Tanzfroue nach Lyss ads Kurswuchenänd ga neuu Tänz lehre.

Delegierteversammlung Region Mittelland het das Jahr am 14. März z`Murri stattgfunge. Dert si Kathrin Hirschi u Silvia Beyeler drbi gsy.

O i däm Jahr het üses Tanzleiterpaar wieder a drüne Tanze mitenand teilgno. Dert wärde die bestehende Tänz ume ufgfrüschet.

Z'Regionauträge im April het Trachtegruppe Riggisberg z' Rügeggisberg düre gführt. Das isch ganz ä luschtige Abe gsy. B'sungersch z Heidi Beyeler het üs immer wieder zum lache bracht. Mir vo üsere Gruppe hei dert aber ou sehr viu tanzet.

Z'Bott z'Thun isch auso wüekli äs Erläbniss gsy. Scho mau wüus so nach isch gsy u wiu aus ou so schön gstatet isch worde. Die ganzi Anlage isch zum Thema Thun u Thunersee dekoriert worde. Dä Alass isch am 27. April gsy.

Daniela u Ernst Rohrer hei am 24. Mai am festleche Tanzabe im Casino z' Bern teilgno.

Am letschte Mänti im August isch üsi Tanzüebig bir Silvia Beyeler z' Schwarzenburg gsy, Dr Höhepunkt vom Abe isch natürlech z Brätle gsy. Aber wis im Summer 2014 ja bekannt isch hets ou a däm Abe wieder eis grägnen u isch kaut gsy. Aber das het üsi Stimmig nit betrüebet. Hei du haut leider nit dusse chönne sy u drum hei mir dä Abe im Garage verbracht. Zwüschem Räge hets du doch ou no chli glängt für dusse chli z'Tanze. Nachbare si zwar du nitso nache cho. Premiere het Denise Bühlmann a däm Abe gha, de sie isch z'erschte Mau Grillmeistere gsy. Bis uf z' Fleisch vor Elisabeth Fankhauser wo chli schwarz isch worde het sie's rächt guät im Griff gha. Danke ihre für d' Unterstützig. Ä Abe wo üsi Kammeradschaft bestimmt ume gsterkt het u bestimmt no lang nit vergässe geiht.

Üsi Tanzleitig het am 26. Oktober am Tanzleiter Träffer z' Gümligen teilgnoe.

Ou i däm Jahr chöi mit ume uf viu schöni Erläbniss z' rug luege. Äs isch eifach so schön wie toll üsi Kameradschaft immer isch. Alli si immer fürenang da. Merci a dere Steu ar ganze Gruppe. Mir Tanzfroue wete aber ou dir Daniela u dir Ernst ganz, ganz härzlech Merci säge für di enormi Gedud wo dir geng für üs ufbringet. Mir freuie üs geng wieder ufe Mäntig für ids Tanze törfte zcho. Mir si stouz so kompetänti Tanzleiter dörfe z ha. Merci euich zwöine ou ganz härzlech!